

## PRIJEDLOG

Na osnovu člana 26. stav 3. Zakona o državnoj službi u institucijama Bosne i Hercegovine („Službeni glasnik BiH“, br. 19/02, 35/03, 4/04, 26/04, 37/04, 48/05, 2/06, 32/07, 43/09, 8/10, 40/12 i 93/17), i člana 17. Zakona o Vijeću ministara Bosne i Hercegovine („Službeni glasnik BiH“, br. 30/03, 42/03, 81/06, 76/07, 81/07, 94/07 i 24/08), Vijeće ministara Bosne i Hercegovine, na prijedlog Agencije za državnu službu Bosne i Hercegovine, na \_\_. sjednici održanoj \_\_. \_\_\_\_\_ 2019. godine, usvojilo je

### **O D L U K U** **O IZMJENAMA I DOPUNAMA ODLUKE O NAČINU POLAGANJA** **JAVNOG I STRUČNOG ISPITA**

#### Član 1.

U Odluci o načinu polaganja javnog i stručnog ispita („Službeni glasnik BiH“, br. 96/07, 43/10 i 103/12), iza člana 6. dodaju se novi čl. 6a. i 6b. koji glase:

#### „Član 6a.

(Postupak registracije kandidata u informacioni sistem za provođenje konkursa Agencije)

Kandidati se obavezuju da prijavni obrazac popune čitko i uredno radi urednog i blagovremenog postupka registracije, obavještanja kandidata kako je to propisano članom 6. ove Odluke, kao i obavještanja putem informacionog sistema za provođenje konkursa Agencije (<https://mojkonkurs.ads.gov.ba>), a posebno podatke: ime, ime roditelja, prezime, jedinstveni matični broj, broj fiksnog ili mobilnog telefona, broj fax-a, e-mail adresa, te adresa stanovanja.

#### Član 6b.

(Obavještanje kandidata elektronskim putem o odbacivanju prijave i rezultatima ispita)

(1) Ukoliko se konkurs provodi putem informacionog sistema za provođenje konkursa Agencije, obavještanje kandidata o odbacivanju prijave, o rezultatima ispita i o plasmanu na listi uspješnih kandidata, kao i druga obavještenja u odnosu na koja kandidat ima pravo žalbe, dostavljaju se kandidatima u elektronskoj formi na e-mail adresu unesenu u postupku registracije.

(2) Elektronski dokument kojim se obavještanje obavlja ima sve elemente koje imaju identični dokumenti štampani na papiru, osim potpisa i pečata.

(3) Umjesto potpisa i pečata, elektronski dokument iz st. (1) i (2) ovog člana sadrži sigurni elektronski potpis Agencije, odnosno ovlaštenog lica, koji po relevantnim propisima ima snagu elektronskog pečata, ovjeren kvalificiranom potvrdom izdatom od strane Agencije.“

#### Član 2.

U članu 17. stav (4) riječi: “primjenom Centralnog registra osoblja a može se pribaviti i mišljenje“ zamjenjuju se riječima: „na prijedlog“.

#### Član 3.

U članu 23. stav (2) iza riječi: “dokumenata“ umjesto interpunkcijskog znaka tačka dodaje se interpunkcijski znak zarez i riječi: „ukoliko se na kandidate iz bilo kojeg razloga ne primjenjuje obavještanje iz člana 6b. ove Odluke.“

#### Član 4.

U članu 24. stav (2) iza riječi: "prijavio," dodaju se riječi: „te provjeru i ocjenu kompetencija neophodnih za obavljanje poslova određenog radnog mjesta,”.

#### Član 5.

U članu 28. iza stava (2) dodaje se novi stav (3) koji glasi:

“(3) Listu uspješnih kandidata čine tri kandidata sa najvećim brojem bodova.”.

Dosadašnji st. (3), (4), (5), (6) i (7) postaju st. (4), (5), (6), (7) i (8).

#### Član 6.

Član 30. mijenja se i glasi:

„Član 30.  
(Rezervna lista)

- (1) Uspješne kandidate sa liste iz stava (3) člana 28., osim onog koji je postavljen na odgovarajuće radno mjesto, Agencija stavlja na rezervnu listu za to mjesto, prema redoslijedu i u skladu sa ukupnim zbirom bodova koji je dodijeljen svakom od kandidata.
- (2) Rezervna lista za određeno radno mjesto važeća je dok postavljeni kandidat ne prođe probni period u skladu sa Zakonom, te se primjenjuje u slučaju kada se radno mjesto uprazni iz bilo kog zakonskog razloga unutar trajanja probnog perioda.
- (3) U toku trajanja probnog perioda rezervna lista, zbog razrješenja državnog službenika prouzrokovanog internim premještajem, može se primijeniti samo jednom.”.

#### Član 7.

Ova odluka stupa na snagu osmog dana od dana objavljivanja u „Službenom glasniku BiH”.

VM broj: \_\_\_\_\_ /19  
\_\_\_\_. \_\_\_\_\_ 2019. godine

Sarajevo

Predsjedavajući  
Vijeća ministara BiH

Dr. Denis Zvizdić

# 1. OBRAZLOŽENJE

## A – PRAVNI OSNOV

Pravni osnov za donošenje ove odluke nalazi se u članu 26. stav 3. Zakona o državnoj službi u institucijama Bosne i Hercegovine („Službeni glasnik BiH“, br. 19/02, 35/03, 4/04, 26/04, 37/04, 48/05, 2/06, 32/07, 43/09, 8/10, 40/12 i 93/17), kojim je propisano da Vijeće ministara, na prijedlog Agencije, podzakonskim aktom utvrđuje način i program polaganja ispita građana, te u članu 17. Zakona o Vijeću ministara Bosne i Hercegovine („Službeni glasnik BiH“, br. 30/03, 42/03, 81/06, 76/07, 81/07, 94/07 i 24/08), prema kojem Vijeće ministara BiH u ostvarivanju svojih prava i dužnosti donosi odluke i druge akte.

## B – RAZLOZI ZA DONOŠENJE ODLUKE I OBJAŠNENJE ODABRANE POLITIKE

Zakon o državnoj službi u institucijama Bosne i Hercegovine („Službeni glasnik BiH“, br. 19/02, 35/03, 4/04, 26/04, 37/04, 48/05, 2/06, 32/07, 43/09, 8/10, 40/12 i 93/17), u članu 26. stav 3. propisuje da Vijeće ministara, na prijedlog Agencije, podzakonskim aktom utvrđuje način i program polaganja ispita građana, te je po tom osnovu i donesena Odluka o načinu polaganja javnog i stručnog ispita („Službeni glasnik BiH“, br. 96/07, 43/10 i 103/12). Zbog unapređenja procesa rada u Agenciji, koji se prvenstveno odnosi na uvođenje elektronske prijave, kao i pružanja bolje usluge korisnicima, te uvažavajući preporuke SIGMA-e i Ureda za reviziju institucija BiH, potrebno je izvršiti izmjene i dopune ove Odluke, a sve u cilju pojednostavljenja načina prijavljivanja na konkurse, te efikasnijeg i adekvatnijeg izbora najkompetentnijih kandidata.

Prilikom izrade ovog podzakonskog akta posebna pažnja je posvećena preciznom normiranju pitanja koja se odnose na postupak registracije kandidata u informacioni sistem za provođenje konkursa Agencije i obavještanje kandidata o odbacivanju prijave i rezultatima ispita elektronskim putem, kao i na listu uspješnih kandidata, te primjenu rezervne liste u toku probnog rada.

Ovaj podzakonski akt u članu 1. predviđa dopunu osnovnog teksta odluke na način da se iza člana 6. dodaje novi član 6a., kojim se propisuje obaveza i način popunjavanja prijavnog obrasca kandidata, i novi član 6b., kojim se propisuje da se, ukoliko se konkurs provodi putem informacionog sistema za provođenje konkursa Agencije, obavještanje kandidata o odbacivanju prijave, o rezultatima ispita i o plasmanu na listi uspješnih kandidata, kao i druga obavještenja u odnosu na koja kandidat ima pravo žalbe, dostavljaju kandidatima u elektronskoj formi na e-mail adresu unesenu u postupku registracije, te koje elemente elektronski dokument sadrži.

U članu 2. propisana je izmjena dijela teksta u stavu (4) člana 17. Odluke, zbog nepostojanja Centralnog registra Agencije, te lakše primjene navedene odredbe u praksi, a odnosi se na imenovanje članova komisije iz druge institucije, ukoliko se član komisije koji ima akademsko i profesionalno iskustvo u oblastima obuhvaćenim procesom javnog konkursa ne može obezbijediti iz institucije na koju se javni konkurs odnosi, o čemu odlučuje Agencija na prijedlog te institucije.

U članu 3. ove odluke dopunjen je stav (2) člana 23. osnovnog teksta odluke, na način da je u istom precizirano da je Agencija obavezna da ostale kandidate, koji nisu stekli pravo pristupa na intervju, pismeno obavijesti o njihovom rezultatu na pismenom dijelu, činjenici da nisu položili ispit i pravu na povrat prethodno podnesenih dokumenata,

ukoliko se na ove kandidate iz bilo kojeg razloga ne primjenjuje obavještanje iz člana 6b. ove Odluke (elektronsko obavještanje).

S obzirom da je Pravilnikom o karakteru i sadržaju javnog konkursa, načinu provođenja intervjua i obrascima za provođenje intervjua („Službeni glasnik BiH“, br. 63/16 i 21/17), uveden okvir kompetencija, u članu 4. je predviđena dopuna stava (2) u članu 24. Odluke, na način da je dodat tekst: „te provjeru i ocjenu kompetencija neophodnih za obavljanje poslova određenog radnog mjesta,“, budući da je način testiranja kandidata na intervjuu pored ocjene znanja, donošenjem navedenog Pravilnika proširen i u dijelu provjere i ocjene kompetencija, u skladu sa Reformskom agendom za Bosnu i Hercegovinu 2015-2018. godina.

Nadalje, članom 5. dopunjava se član 28., na način da se dodaje novi stav (3), kojim je decidno propisano da listu uspješnih kandidata čine tri kandidata sa najvećim brojem bodova.“, na koj način se lista uspješnih kandidata skraćuje na tri prvoplasirana, u skladu sa preporukama SIGMA-e i Ureda za reviziju institucija BiH.

Članom 6. izmijenjen je u cijelosti član 30., na način da se precizira stavljanje uspješnih kandidata na rezervnu listu, dužina trajanja iste, kao i njena primjena u toku probnog rada postavljenog kandidata.

Stupanje na snagu odluke propisano je u članu 7. iste.

## **C – PRINCIPI NA KOJIMA JE ZASNOVAN PROPIS**

Principi na koji je zasnovana ova odluka su: zakonitost, transparentnost, jednakopravnost, zaštita prava državnih službenika i zaštita javnog interesa.

## **D - USKLAĐENOST PROPISA SA EVROPSKIM ZAKONODAVSTVOM**

Analizom sekundarnih izvora prava Evropske unije utvrđeno je da materija koja se utvrđuje Prijedlogom odluke nije regulisana pravno obavezujućim aktima Evropske unije, te u skladu sa navedenim nije moguće dati ocjenu usklađenosti.

## **E – PROVEDBENI MEHANIZAM I NAČIN OSGURAVANJA POŠTIVANJA PROPISA**

Za provođenje i osiguranje poštivanja odredbi ove odluke zadužena je Agencija, odnosno zaduženi su rukovodioci unutrašnjih organizacionih jedinica i uposleni koji su određeni kao odgovorni za provođenje konkursnih procedura.

## **F – FINANSIJSKA SREDSTAVA ZA PROVOĐENJE PROPISA**

Za sprovođenje ove odluke neće biti potrebna dodatna finansijska sredstva, a što je iskazano u obrascu OFP – NE.

## **G – OBRAZLOŽENJE MOGUĆIH EKONOMSKIH, SOCIJALNIH I OKOLIŠNIH UTJECAJA PROPISA**

Ova odluka nema nikakvog okolišnog ni ekonomskog utjecaja, dok je socijalni utjecaj vjerovatno mali, s obzirom da se istom, kao provedbenim propisom, samo detaljno uređuje, odnosno dopunjavaju i mijenjaju određene norme važećeg podzakonskog akta, a koje se odnose na prijavljivanje kandidata na konkurse i pojedine faze konkursne procedure.

## **H - OPIS KONSULTACIJA VOĐENIH U POSTUPKU IZRADE ODLUKE**

Prijedlog odluke je dostavljen institucijama koje mogu dati primjedbu na isti s obzirom na svoje nadležnosti, a to su: Ured za zakonodavstvo Vijeća ministara Bosne i Hercegovine, Ministarstvo pravde Bosne i Hercegovine, Ministarstvo finansija i trezora Bosne i Hercegovine, kao i Direkcija za evropske integracije Vijeća ministara Bosne i Hercegovine.

Predloženi tekst odluke sa obrazloženjem je takođe postavljen na platformu e-konsultacije, kako bi se dobio što veći broj mišljenja i eventualnih sugestija na isti, a obavještenje da je isti postavljen na platformu e-konsultacije stavljeno je i na službenu internet stranicu Agencije.